

Akara: “Esbosu Lei Kriminaliza Difamasaun Laiha Intensaun Bandu Liberdade Espresaun”



Sekretariu Estadu Komunikasaun Sosiál, Merício Juvinal dos Reis ‘Akara’. Imajen/Egas Cristovão

DILI, 12 juñu 2020 (TATOLI) – Sekretáriu Estadu Komunikasaun Sosiál, Merício Juvinal dos Reis ‘Akara’, hateten relasiona ho esbozu ba Projetu Lei Difamasaun ne’ebé inisia husi Ministériu Justisa, ne’e sei la hamate liberdade espresaun sidadaun sira nia tanba Governu sei garantia no prontu simu kítika.

“Esbosu Lei Kriminaliza Difamasaun laiha intensaun atu bandu liberdade imprensa liberdade espresaun tanba ita-nia Konstituisaun artigu 40 no 41 ne’e garantia no Lei Komunikasaun Sosiál mós garante ne’ebé Governu no Estadu ka’er ida-ne’e,” tenik Sekretáriu Estadu Akara iha Palásiu Governu, sesta ne’e.

Nia informa, idea kriminaliza difamasaun ne’e promove husi Ministériu Justisa (MJ), maibé Konsellu Ministru mós seidauk diskute tanba sei presiza prosesu naruk hodi halo konsultasaun ho comunidade média, sociedade sivil no parte Igreja inklui sidadaun hotu hafoin lori ba Parlamentu Nasionál.

“Ita labele halo konkluzau katak lei difamasaun ne’e atu bandu ema nia direitu, ne’e sedu liu tanba ne’e foin iniciativa hodi soe idea atu ita halo diskusaun,” nia subliña.

Ho nune’e, Sekretáriu Estadu ne’e konsidera iniciativa lejizlasaun ne’e presiza kontribuisaun no ideia husi parte hotu, maibé di’ak liu halo karta eskrita hodi halo diskusaun di’ak no kle’an liután.

“Ha’u hanesan Sekretáriu Estadu, garante ba ita bo’ot sira (jornalista) katak laiha planu no intensaun polítika atu limite liberdade imprensa no espresaun. Tanba ne’e labele halo konkluzasaun sedu liu hodi julga dehan Governu ida-ne’e atu avansa ho ditadura tanba alerjia ho kítika sein rona esplikaun detallu husi prosesu hirak ne’e,” adianta SEComS Akara .

Nia afirma Governu só iha intesaun atu reforsa tan Liberdade imprensa no espresaun liuhusi regula liberdade sira ne’e atu labele halo kanek fali ema seluk nian direitu.

“Ne’e normal tanba la’ós ita uza ita nia liberdade imprensa no espresaun atu depois ita duun matak ema, dez-kredita ema nia dignidade ne’e lei la dehan ida ne’e. Maibé Liberdade espresaun ne’e uza positivamente hodi konstrui nasaun no Estadu no desenvolvimentu tuir dalan demokrasia, ne’ebé la’ós sebaliknya,” katak.

Governu sei asegura Liberdade impresa no espresaun hodi kumpre konstituisaun artigu 40 no 41 no lei komunikasun sosiál ne’ebé ita boot sira servisu avontade.

“Ita nia Governu avontade atu simu Kítika, ita nia primeiru Ministru mós dehan bebeik katak kolega di’ak liu mak sempre fó Kítika, ne’ebe Governu la alerjia ho Kítika no Primeiru Ministru mós la bandu ema Kítika,” nia akresenta.

Tuir nia, intensaun husi kriminaliza difamasaun ne’e atu haree de’it ba ema sira ne’ebé duun matak ema, akuza ema sein faktu no seluk tan, maibé la taka dalan ba ema sira halo Kítika ho konstrutivu.

“Ha’u husu sociedade sivil, Igreja no comunidade média bainhira iha idea no avontade bele fó ba Ministériu Justisa hodi halo diskusaun, nune’e média bele kontinua servisu tuir kódigu étiku jornalís sira, tanba lei proteje ita bo’ot sira,” governante ne’e apela.

Daudaun ne’e Sekretáriu Estadu Komunikasaun Sosiál no Ministériu Asuntu Parlamentár no Komunikasaun Sosiál dezenvolve hela Lei Radiodifizaun atu regula espesifikamente ba programa no notisia falsa nune’e bele garante média sira atu fó imformasaun ne’ebé loloos no kredível.